

Izveštaj o realizaciji godišnjeg programa rada CHJ MFiT BiH

OBRAZLOŽENJE

Godišnji program rada Centralne harmonizacijske jedinice Ministarstva finansija i trezora BiH (CHJ MFiT BiH) za 2016. godinu pripremljen je u skladu sa Odlukom o godišnjem planiranju rada i načinu praćenja i izvještavanja o radu u institucijama BiH („Službeni glasnik BiH“ broj 94/14). Godišnji program rada CHJ MFiT BiH predstavlja planirane rezultate za 2016. godinu koji se zasnivaju na srednjoročnom planu rada CHJ MFiT BiH.

CHJ MFiT BiH je, u skladu sa zakonskim ovlaštenjima i ciljevima iz srednjoročnog plana rada, nadležna za uspostavu i razvoj javnih internih finansijskih kontrola (PIFC) u institucijama BiH. Uspostava i razvoj PIFC-a u institucijama BiH je važan dio reforme javne uprave u BiH.

Tri su ključne komponente PIFC-a:

- CHJ MFiT BiH,
- Finansijsko upravljanje i kontrole i
- Interna revizija

U skladu sa Zakonom o internoj reviziji u institucijama BiH, Zakonom o finansiranju institucija BiH i Odlukom o uspostavljanju CHJ MFiT BiH je, između ostalog, odgovorna za:

- Pripremu i ažuriranje strateških dokumenata iz oblasti PIFC-a,
- Pripremu zakona i podzakonskih akata iz oblasti PIFC-a,
- Definisanje sadržaja programa obuke i koordinaciju programa obuke iz oblasti PIFC-a,
- Izrada godišnjih konsolidovanih izvještaja iz oblasti interne revizije i finansijskog upravljanja i kontrole u institucijama BiH i
- Učešće u radu KO CHJ

Ciljevi srednjoročnog plana rada CHJ MFiT BiH proizilaze iz mandata, odnosno misije CHJ MFiT BiH. Obzirom na činjenicu da se srednjoročni plan rada institucija realizuje kroz godišnje planove rada, godišnji plan rada CHJ MFiT BiH za 2016. godinu predstavlja planirane razrađene ciljeve iz srednjoročnog plana rada.

S tim u vezi, CHJ MFiT BiH je u toku 2016. godine pripremila Strategiju razvoja internih finansijskih kontrola u institucijama BiH za 2016-2018. godinu. Strategija o razvoju javnih internih finansijskih kontrola u institucijama Bosne i Hercegovine za period 2016-2018 drugi je strateški dokument u ovoj oblasti u institucijama BiH. Strategija sadrži analizu sadašnjeg stanja javnih internih finansijskih kontrola uključujući analizu zakonodavnog i institucionalnog okvira s posebnim naglaskom na praktičnu implementaciju ovih sistema, naročito u procesima iz budžetskog ciklusa. Polazeći od postojećeg stanja, uočenih slabosti i poteškoća, te preporuka Evropske komisije, Strategija određuje ciljeve i aktivnosti daljnjeg razvoja koji će javne interne finansijske kontrole približiti standardima i praksi Evropske unije. Vijeće ministara BiH je usvojilo Strategiju razvoja internih finansijskih kontrola u institucijama BiH za 2016-2018. godinu 29.12.2016. godine na 87. sjednici.

U oblasti finansijskog upravljanja i kontrole ostvareni su zacrtani ciljevi koji se odnose na izvještavanje i realizaciju obuka iz oblasti finansijskog upravljanja i kontrole. U 2016. godini je urađen prvi Godišnji konsolidovani izvještaj o sistemu finansijskog upravljanja i kontrole u institucijama BiH za 2015. godinu. Vijeće ministara BiH je usvojilo predložene zaključke iz Godišnjeg konsolidovanog izvještaja o sistemu finansijskog upravljanja i kontrole. Godišnji konsolidovani izvještaji o sistemu finansijskog upravljanja i kontrole je usvojen i od strane Komisija za finansije i budžet oba doma Parlamentarne skupštine BiH.

CHJ MFiT BiH je donijela i realizovala Plan i program obuke iz oblasti finansijskog upravljanja i kontrole u institucijama BiH za 2016. godinu. Obuci je prisustvovalo ukupno 105 polaznika iz 65 institucija BiH.

U oblasti interne revizije su ostvareni ciljevi koji se odnose na izvještavanje i verifikacije i certifikacije internih revizora. Vijeće ministara BiH usvojilo je i Godišnji konsolidovani izvještaj interne revizije za 2015. godinu. Ovaj izvještaj daje osnovne podatke o sistemu interne revizije u institucijama BiH, aktivnostima CHJ MFiT BiH, o jedinicama interne revizije, internim revizorima, revidiranim institucijama i podatke o poduzetim aktivnostima na realizaciji zaključaka Vijeća ministara BiH. U 2016. godine CHJ MFiT BiH je organizovala obuku za sticanje Certifikata ovlaštenog internog revizora u institucijama BiH za osoblje interne revizije i okončan je teorijski dio procesa certifikovanja, kao i pismeni ispit u okviru istog procesa.